

Hibru

Anut Nanun san yaŋan tubun a

1 ¹Wagam na mok profet adi awad lo Anut id tubud baged ru irupidai se ya, saen wei mi agod dal sensen lo iŋ ago igane ya. ²Gug gamu nal wadan en lo man iŋsinan Nanun awan lo irupaiaa a. Iŋsen lo mok Anut mel fidian igane ya, agod Anut sen iŋ murnap mel an fidian taman imado wo ipiliani a. ³Iŋsen iŋ Anut san lilaman iŋ lo yen dan isapudadeg Anut san girager tubun an kuai te ikubiai tile ya. Iŋsan bunun an nek Anut sinan bunun mok igo ya. Agod iŋsinan ru dabai an nam mel fidian igane ilasag yen yau da. Iŋ tamolpein sad aupasek isuas yau san dal ikubuneg itout a, ago gug iŋ kumaen panu lo Anut lak na yak iŋanen banin won ak lo imasig imado ya.

Nanun san yaŋak eŋel sad yaŋak iriŋani a

⁴Anut yaŋak Nanun ipani an uyanan mok a. Yaŋak an eŋel adi sad yaŋak dam iriŋani a. Nek ago mi Anut Nanun ipilianig dabai tubun eŋel sad dabai iriŋanai ak ipani a. ⁵Anut eŋel ta irupeig ibol,

“Oŋ ŋaineŋ nanug, agod gamu ŋai oŋane tama.”

Iŋ ta ago ibol na ya. Agod fon eŋel ta niŋen ago ibol,

“Iŋai iŋsan taman ŋumado dop

iŋ ŋaisag nanuk imado wa.”

An dam ta ibol na ya. ⁶Gug saen Anut Nanun matu an iŋaneg tan na ipalu an niŋen o ago ibol,

“Anut san eŋel adi fidian iŋ niŋen o ubou an dile wa.”

⁷Aria, eŋel adi sed niŋedi wo man Anut ibol,

“Anut iŋanen eŋel adi man tim igo woŋ a,

iŋanen urat pinein adi man yai balen imasa dak igo woŋ a.”

⁸Ak man Nanun niŋen o ago ibol,

“O Anut, oŋsa Kiŋ san kalik an pempem yen yau san a.

Agod Kiŋ san makud bani lo wabi dan an kagin itaot san makud igo woŋ a.

⁹Oŋ kagin itaot ak niŋen o mi umat da, agod kagin saian ak umoi geig da.

- Fun amaiak ninen o Anut, inŋ onjane Anut, onjane tura murou sad
malan te iginio ya,
agod yousai san gureŋ an onŋ tini fo ikulmaek idu ya.”
- ¹⁰ Anut Nanun irupei dag ibol,
“O Tubun en, fun lo mok onŋ tan en san kadaŋ guni a,
mel fidian lak na yan dam onŋse bani lo diri a.
- ¹¹ Mel an fidian dideg diau a, gug onŋ man mado wa,
inŋ yamel wagam ak itout yau igo woŋ a.
- ¹² Onŋ nek ibol yamel dululumip diabi yau ak igo woŋ mel fidian lak na
yan, tan en lo dam ago gane wa.
Nek ibol yamel wagam ak dupasip foun ak digane dak igo woŋ, onŋ
mel fidian bilisap foun ak dilasa wa.
Gug onŋ man igo pempem mado wa,
onŋsa ananar itout san tia ya.”
- ¹³ En dugo, Anut enŋel ta irupeig ago ibol,
“Onŋ nŋaisag aben malan te yak ate mado dop
nŋai onjane ager adi nŋidiraip paen na dumado wa,”
Anut ru ta ago ibol man tia ya. ¹⁴ Enŋel adi an enso mel ta i? Inŋ man ur,
amaiak Anut idinaig tamolpein a patud ipasi san amaiak dibinawai o
dudu ya.

Anut inŋiliad an mel tubun a

2 ¹Fun amaiak ninen o id ru rumok a talonŋ an tabi sakar a, ago dop an
lo na id tadeŋ tau san tia ya. ²Tubud baged adi wagam enŋel awad lo
kubiaenŋ san ru diŋane ya. Ru dulonŋ an yen sakar da, fun an ninen o talpein
enti aupasek ta igane, tia, awa parsisalek ta igane tap, kulob an san naon
atem itaot inŋane wa. ³Fun amaiak ninen o id patu pasek uyanan en patud
tupani tap, en dugo woŋ id aupasek naon an tabi-riŋani wak i? Tubun en
inŋsen malan malan mok patu pasek ninen o ibol ilasa ya, agod a inŋ awan
dulonŋ an id dukubiai tile yak ru an ru rumok a. ⁴Saen nek an lo mi Anut
tamolpein a mel malad nam dile amaiak inŋsad ru an dabai ipani. Inŋ kulob
girager agod urat dabai tutubun ak igane na ya, agod inŋsen ilon ibol ak lo
mi Awan Urgun san dabai lo inŋ urat digane san bar funfun iwae pidinai a.

Jesus sen imug inŋiliad a

⁵Man dugo, Anut inŋ enŋel adi tan foun murna ilasa wan kagin dupani
wo ta ipilianai na ya. Tan amaiak ninen o nŋai ru nŋabol da. ⁶Gug Anut san
girek ta lo ru en igo ibol,
“Tamol man nek mel kawan ak igo ya, amaiak ninen o, ata wo inŋ o
ilo isou di?
Tamol nanun man inŋ mel tubun tia ya, an ninen o onŋ ata wo inŋ
kagin pani uyan di?”

- 7 On saen katukan mi in enel paed na gane ya,
 agog in girager yanak tubun ak da pani a,
 8 agod mel fidian in taman imado wo tuon lo diri a.”

Aria, saen Anut tamol igane yan, in mel fidian sad taman imado wo ago ibol a, an lo in mel ta ibiseip tamol san kagin panek patun fo yen man tia ya. Ak man gamu saen en lo man tamolpein mel fidian kagin dupani dop id tile man tia ya. 9 Gug id Jesus mi tile da, in saen katukan mi Anut in enel paed na imado wo igane ya. Agod ilo mujanek Anut ipanad dan ningen o in tamolpein fidian abed inane mater in ile ya. Mater an lo na in madai ikubiani a, fun an ningen o gamu id tile yak in yanak tubun ak girager da inane ya.

10 Nek uyan ak Anut in mel fidian idirig ago dien diau dan, Jesus madai isini an lo in inane itaot mok ilasa ya. Nek an lo in nanuk wei mi in al ipalup in san girager an lo in da sisem dumado wa. Man ata wo? Jesus sen in patun pasek san fun. 11 Ta a tamolpein gun dilasa wo igane dan, agod tamolpein a gun dilasa yan, in sisem fudi kisaek a. Fun amaiak ningen o Jesus in tein taon ibol san ningen o miai ta ifuni da. 12 In Anut ningen o ago ibol da,

“Inai onsa yana an teig taog gurupidai dulong a,
 insad tumanek lo inai bar nabi dop on yana nabisa wa.”

13 In dam ago ibol,

“Inai Anut tinig nupanig numado da,”

agod in fon ibol,

“Inai ebo Anut nanun muroun ipanag emaiak dida mumado da.”

14 In san nanun muroun en man in tan en san tamolpein mi, fun amaiak ningen o nek in dumado dan ago mi Jesus dam in san tinin, tan en san tinik igo won ilasa ya. In ago igane yan lo in san mater lo Satan mater san dabai aman da yan ka ipitini wa. 15 Dal emaiak lo in tamolpein inane mater san rerek lo patud ipasig maror ipidinai a, in fon mater san rerek inane madok lo kagin ipidinai yau san tia ya. 16 Id talon ak mel an man rumok a, man dugo, in enel ta ibinawai na ya, tia, in Abraham san sawar ibinawai a. 17 Ago yak ningen inane kagin naok naok lo in tein taon dumado dak ago mok ilasa wa. Ago dop an lo na in inane pris malan te yak ilasap ago imado wa. In san urat awan lo Anut ibinawi dan igo ya, in awa yabek tamol agod ilo mujanek tamol an lo in tamolpein sad aupasek an ningen Anut ilon igane ibubarum a. 18 In sen aupasek san ate suek lo itur go madai ikubiani a, fun amaiak ningen o in gamu tamolpein a aupasek san ate suek dile dan ka ibinawai uyan a.

Jesus san yanak tubun an Moses yana irinani a

3 1 An ningen o an inane teig taog gun ak, an man da Anut san wagin an lo itumanad go tumado dan, an Jesus ningen o mi ilom isou a. In

aposel agod iŋ pris malan te yak an niŋen o tabol ilasa da. ²Iŋ Talpein a ipilian i an awan iri pani a, nek ibol Moses Anut awan kagin ipanig Anut san ab ilon lo urat igane i go ya. ³Nek ibol tamol ab yabi an yaŋan tubun dugo ab mok sen man yaŋan tusan ak ago ya. ⁴Rumok, ab fidian kisaek kisaek atem tamol diabi da, ak man Anut sen iŋ mel fidian idirai an iriŋanai a. ⁵Moses iŋ Anut anen ab san tamolpein fidian lulunjad lo urat pinein i go Anut awan iri panig urat igane ya. Nek mel amaiak saen murnap ilasa dan te dop ru a iŋ niŋen dubol an Moses dam gubak mi niŋen o ibol ilasa ya. ⁶Ak man Kristus iŋ Anut Nanun mok imado ya, an lo iŋ Anut san ab lo tamolpein kagin ipidinai a. Id dabai amad da Anut anen ru tabol dan, id ilo uyan amad da mel a Anut ipanad ak niŋen o ilod yen dan tabi sakar tap, id Anut san ab mok a.

⁷Amiaiak niŋen o nek ibol Awan Urgan gubak mi ibol ago,

“Nek gamu en, aŋ iŋsan awan alon tap,

⁸aŋanem bubem aganep sakar ilasa amoi.

Nek ibol wagam aŋ tubum bagem bitinaek san saen lo tan kawan ak ate Anut patud dupani ago mi,
aŋ kagin an ta agane na wa.

⁹Saen an lo iŋ ŋai tuog lo bitinaek an diganeg dukubianag se ya.

Anaŋar 40 ŋaisag urat dabai fidian ŋigane an dile bo man ŋai patud dupanag se ya.

¹⁰Fun amaiak niŋen ŋai iŋ niŋedi wo tiŋaeg saian go ago ŋabol,

‘Iŋsad bubed lo iŋ pempem dal senamo diau da,
agod iŋ ŋaisag dal dugo won ŋau dan ta dulon na ya.’

¹¹Ŋaisag tiŋae saiak lo geg sakar ak ŋigane yan, ago ŋabol,

‘Rumok lak na, iŋ ŋaisag yaes bilabal lo ta mok diladu na wa.’”

¹²An niŋen ŋai teig taog, kagin agane wa. Kabelan aŋ lulunjam lo ta iŋ buben ilo sou saian aman dap, ilon lo rumok tiap, Anut kumaen pempem san an patun ipani banau. ¹³Tia, nal fidian aŋ tan suek ru nug arupe i, nal “gamu” dubol dan lo aŋ ago agane wa. Kabelan aupasek san kagin irawan dop aŋ lulunjam lo ta bubem afutani banau. ¹⁴Ilo rumok malan malan an id fun tiganeg an tabi sakar pe yaup wadan na idu tap, an lo id Kristus da sisem tutumani wa. ¹⁵Id talon ak ru e Anut Dawid ipani yen yen geig da, an ago ibol,

“Nek gamu en, aŋ iŋsan awan alon tap,
aŋanem bubem aganep sakar ilasa amoi.

Nek ibol wagam aŋ tubum bagem bitinaek san saen lo tan kawan ak ate Anut patud dupani ago mi,
aŋ kagin an ta agane na wa.”

¹⁶En sauta wagam Anut awan dulon gug awa parsisalek digane i? An tamolpein wagam Moses iŋal go Igipta tan dibiseig diau ama ya. ¹⁷En sauta anaŋar 40 iŋ Anut tiŋae saiak dupani se i? An tamolpein a aupasek

diganeg dumat go sad susanud tan kawan ak ate dudu ama ya. ¹⁸Agod en sauta niĵedi wo Anut rumok lak na yaes bilabal lo diladu san tia ago ibol irupidai i? An tamolpein a iĵ awan duparsisali ama ya. ¹⁹An niĵen o id tile taloĵ ak iĵ diladu san tia ya, man dugo, iĵ ilod lo ta rumok na ya.

Anut san tamolpein iĵsan yaes bilabal lo diladu wa

4 ¹Aria, id Anut san yaes bilabal lo tiladu san ru gubak mi yen la ya. Fun amaiak niĵen o id man tarut dop tarer a. Kabelan Anut aĵ aenta luluĵam lo ta bitinaek lo idiraĵ pe, aĵ iĵsan yaes bilabal lo aladu san ariĵani banau. ²Rumok, Anut ru id girajeĵ na ipalu yan, nek gubak mi iĵ girajeĵ na ipalu yak igo mi a. Gug ru a duloĵ an ta ibinawai na ya. Man dugo, rumok iĵ ru an duloĵ a, ago gug iĵ ilod lo ta rumok na dan lo ru an nuĵon ta ifu na ya. ³Id ilod lo rumok an mi yaes bilabal amaiak lo tiladu wa. Nek ibol iĵ ibol ak igo,

“Ĵaisag tiĵae saiak lo geg sakar ak ĵigane yan, ago ĵabol,

‘Rumok lak na, iĵ ĵaisag yaes bilabal lo ta mok diladu na wa.’”

Saen Anut tan en igane yan lo iĵsan urat fidian igane itout a. An niĵen o id taloĵ ak, Anut san yaes bilabal yen la ya. ⁴Man dugo, girek ta lo iĵ nal seven niĵen o igo ibol,

“Anut nal seven lo iĵanen urat an fidian niĵedi wo yaes ibal a.”

⁵Agod fon girek kisaek en lo igo ibol, “iĵ ĵaisag yaes bilabal lo ta mok diladu na wa.”

⁶Amiaiak niĵen o id tile dak aenta diladu san dal ipasig yen da, ak man aenta a gubak mi Anut ru diĵane yan diladu san dal diriĵani da, man dugo, iĵ awa parsisalek tinadi a. ⁷Fun an niĵen o iĵ fon mi nal itaot ipiliani a, “gamu en”, ata wo, Anut tan iganeg saen milaen mok gug Dawid awan lo igo ibol,

“Nek gamu en, aĵ iĵsan awan aloĵ tap,
aĵanem bubem aganep sakar ilasa amoi.”

⁸Rumok, Josua iĵ yaes ka ipidinai tap, Anut murnap fon mi nal sen ak niĵen o ibol san tia wa. ⁹Fun amaiak niĵen o yaes bilabal bageu san Anut anen tamolpein niĵedi wo yen da, yaes bilabal an nal seven san igo ya.

¹⁰Man dugo, ensauta Anut san yaes bilabal lo diladu dan iĵaned urat tan en lo digane yan dibisei da, nek ibol Anut iĵsen urat a igane dan ibisei ak igo mi a. ¹¹An niĵen o id yaes bilabal amaiak lo tiladu wo urat wagai tigane wa. Ago dop aenta luluĵad lo awa parsisalek kagin naok an lo diau dudu banau.

¹²Anut san ru man kumaen a, agod dabai aman da ago yen da. Nek ibol bubarek kisaek malan uraru aman da yak igo woĵ, an talpein tinin isuep iladu yau geig da, iĵsan ĵutun ur da ibiatai da, tatu batek dam titiĵaem igilep sensen dilasa wa. Agod bubed san kankan iĵ ilo girek da ka ikubiani san ilonĵ da. ¹³Agod iĵ malan lo talpein ta imianuk san tia ya.

Tia, enti id ru naon tupani san inj malan lo man, mel fidian walal te mi itufulak go dien da.

Jesus sen idsad pris malan te ya

¹⁴Id pris malan te tutubun ak amad da ya, an niŋen o inj lak na yaug, id Anut san na tau san dal yabirubeg iladu ya, an man nek Jesus, Anut iŋanen Nanun. Amaiak niŋen o id ilo rumok san ru tabol ilasa san tabip sakar a. ¹⁵Dugo, idaned pris malan te tubun ak idsad muruan funfun niŋen o ilo muŋanek ipanad san ta idaisuda na yak i? Tia, inj tamol naok ago tia ya. Man dugo, bitinaek naon funfun id lo ipalu dan ago mi inj lo dam yau da, ago gug inj aupasek ta igane man tia ya. ¹⁶An niŋen o id pempem Anut san kalik giranjen na tau a, ante man Anut ilo panek iwae san aben mi a. Aben an lo saen muruan sumeik ipanad dan, ilo muŋanek ka tiŋane wa, agod iŋsan ilo panek id ibinawad san tile wa.

5 ¹Pris malan te yan kisaek kisaek tamol lulunad lo Anut ipiliani a. Agod iŋsan urat man, tamolpein waged lo lou kawan ak inj mel mudan a yai lo dumari san da, iŋsad aupasek ipasi yau wo Anut ipani da. ²Inj tamolpein a ilod tia yan, agod a dal diapitilip sen diau dan dam mos nam kagin ka ipidinai a, man dugo, inj dam dabai aman tia yan lo yau idu da. ³Fun amaiak niŋen o, inj malan malan man iŋsinan aupasek isuas san niŋen o yai igane wa. Agop murna man tamolpein sad aupasek niŋen o dam yai ka igane wa.

⁴Pris malan te yak inj yaŋan anda ya, ago gug talpein ta sen ilon nam urat an iŋane san tia ya. Tia, Anut talpein an imug iwagin a, nek ibol wagam Moses tein Aron iwagig pris malan te ilasa yak igo mi a. ⁵Nek ago mi Kristus dam inj sen tinin nam pris malan te yak imado wo ta igane na ya. Tia, enti a inj irupeig igo ibol,

“Oŋ ŋaineŋ Nanuk,

agod gamu en ŋai oŋane Tama ŋumado da,”

amaiak Kristus ipiliani a. ⁶Agod girek ta lo fon igo ibol,

“Oŋ pris pempem san,

oŋ pris naok Melkisedek imado yak igo, oŋ dam mado wa.”

⁷Saen Jesus tan na imado se yan, iŋanen gudanek lo pempem imosiai dugo, awan tubun mi tinan iŋaneŋ Anut o maten san dabai lo ka patun ipasi wo igudani a. Agod inj Anut awan kagin ipani uyan go sen yabi idu ya, an lo Anut iŋsan gudanek ilon a. ⁸Inj man gidad Anut Nanun bo man, madai isini se yan lo awa yabek kagin ilon uyan a. ⁹Agod saen inj awa yabek kagin a lo itaot mok ilasa yan, inj tamolpein ensauta awan kagin dupani dan niŋedi wo patun pasek pempem san fun mok ilasa ya. ¹⁰Agod Anut inj pris malan te imado wo kob ipani a, nek ibol Melkisedek igo mi a.

Dutur sakar san ru kagin

¹¹Mel en niŋen o man ru mubate wo iloma yen da, ak man man fun mabol ilasa wo kitek muruan a. Man dugo, an alon pe anane kisaek san

tia ya. ¹² An girek maŋau alasa san saen idaisuda ya. Ak man talpein ta fon pitejanek pasauman ak lo Anut ru ilon lo yen dan ikubiai panaŋ san ningen o aŋ katuk amami da. An anan sakar ak ani san ta idaisuda ya, ago gug an su mi aluk san ningen o katuk amami da. ¹³ Alon uyan, enti in su mi iluk o igane dan, in kagin itaot san ru ningen o inon da, man dugo, in nanuk mi a. ¹⁴ Ak man anan sakar man tamol tutubui ak sadi a, en sauta a Anut ru pempem dusuti dan lo, mel uyan ak saian ak da ningen o ilod igire dugo dupiliani uyan san dulon da.

6 ¹ Ago yak ningen o id tamug tilasap, pitejanek pasauman Kristus ningen o yan tibiseip yen dop, tusokalik pe tamol tutubu yak sad pitejanek lo tiladu wa. Id gamu pitejanek pasauman ak tibiseip bag foun ak tugunai wa, kabelan id bag wagam an fon mi tugunai o tigane banau. Ru en igo ya, mater san urat fidian lo id ilod ibileksap tadanja san pitejanek, id Anut ilod lo rumok ak san pitejanek da, ² agod fulanek funfun san, tinid fo banim agane san, dumat pe fon dumasa wak, agod Anut id bitinaek lo idirad pe pempem san pani naon ipanad san, an fidian niŋedi wo ta tabol na wa. ³ Aria, id gamu en tamug tau a, agod Anut awok ibol tap man, id ka ago tigane wa.

⁴ Ak dugo, tamolpein a in gubak mi Anut san lilaman in sad turen lo isapudade yan, agod kumaen panu san binawek kawan a igane ipalug dukubiani dile yan, agod nug dupinig Awan Urgun da dutor dan, ⁵ agod in Anut san ru a dukubianig dile yan uyanan, agod in madok a sumeik ipanad dan san dabai sensen dile dulon la bo man, ⁶ murnap Anut patud dupani tap, an dugo ilod isou wak i? Id talpein an ka tanal tamul pe ilod fon ibileksa san dal dile wak i? Man tia geig a! Man dugo, kulob en igo digane tap, an man in fon Jesus aigim fo dubali da wa, agod in tinin diabisa dop malak malak lo miai dupani wa.

⁷ Tan en lo saen wei mi ui idu den san you iluk da, agod anan uyanan ak tamolpein a anan dupae dan niŋedi wo igane ilasa tap, Anut san bar uyanan inane wa. ⁸ Gug tan en in ai dudurun anda yak mi, kurkur saiak saiak mi disa tap man, tan an saian a, agod lou aman tia ya. Saen milaen tiap tan muroun bar saiak ipani dop ipitini wa. Tan en itout san man dumari wa.

⁹ O maŋsama adi, maŋ ru an mabol bo man, maŋ an niŋem o igo iloma lo rumok. Melmel patun pasek san uyanan ak mi an, an o ilasa wa. ¹⁰ Man dugo, Anut in kagin itaot tia lo, ananem urat agod ananem ilo panek, saen in yan lo an gun adi kagin apidinai se yan, an akubiai apidinai dan ile pilti san tia wa. Kagin uyanan an an gamu nek ago mi agane da. ¹¹ Maŋsama iloma igo won a. Nek ibol kagin a an lo atur sakar dan, nek ago mi an ananem ilo rumok mel a ningen an tinim agane dan abi awan isap, an lo dam atur sakar a. An anek anek atem urat wagai agane dop amado yaup ananem saen wadan ilasa wa. ¹² Dal amaiak lo an

ta ayalis na wa. Tia, an dam tamolpein a Anut ilod lo rumok go, muruan lo dutur sakar dan lo, Anut san promis dijanane dan, ihsad kulob an an agam anjane wa.

Anut san promis san nujon ilasa wa

¹³ Saen Anut Abraham promis ipani wo ilon yen, talpein ta ihsan yajan an, Anut yajan irijani dan imado man tia yan ninjen o, Anut sen yajan lo rumok lak na ibol go ¹⁴ ago ibol, “Rumok geig, naj onj bar uyanan njupano wa, onjane mala kubalan wei mi njiganep ilasa wa.” ¹⁵ Abraham ru an ilon go sen dabai ipanig, mala nouk imado yang saen milaen gug promis an san nujon injane ya.

¹⁶ Rumok, tamol adi in talpein sen ak irijanai dan yajan lo inaned ru dabai dupani wa. Agod saen in ru lo nug dufuni dan, kulob an lo ru digane itout a. ¹⁷ Ago yak ninjen o tamolpein a Anut ihsan promis san nujon dijanane wan, ihsan ilobol ibileksa san tia yan, an kuai te ikubiai dile wo ilon yen da. Amaiak ninjen o in ru rumok lak na ibol an lo ihsan promis ru dabai ipani a. ¹⁸ An lo na mel uraru a tibilsa san tia yan, agod an ninjen o Anut sewak ipanad san ta isuda na yan, lo id tan suek tubun ak ipanad a, an lo id a aupasek ninjen o tasol man, melmel a naod na iganeg ninjedi wo mala naok tumado dan, tinjanep tabi sakar onj a. ¹⁹ Id Anut tinid tigane tupanid amaiak anga igo wonj njutud yabituani da. Tini ganek amaiak dabai aman da ya, an lo iganeg id dalawan san yamel an patun fo taug galun Gun Di, Gun Mok an ilon lo tiladu ya. ²⁰ An lo Jesus id ninjed o imug mi iladu ya. Inj man pris gurman pempem san, naok Melkisedek igo wonj ilasa ya.

Melkisedek yajan tubun a

7 ¹ Melkisedek in taun Salem dubol dan san kin, agod in Anut Naon Tubun Lak Na yan san pris imado ya. Saen Abraham yu iganeg kin aenta ifu itout go imul an, Melkisedek Abraham ile wo yang dal na nug dileg bar ipani a. ² Agog Abraham mel fidian isini an itarpaleg malan 10 itumani, ago gug malan kisaek inaneg Melkisedek ipani. Aria, yajak Melkisedek man fun igo ya, “kagin itaot ak san kin,” agod in mi Salem san kin, an san fun man “maror san kin.” ³ Inj tinan taman tia, tubun bagen dam tia ya. Tinan igansi ak san nal, imat ak san nal dam ta talonj a. Nek ibol Anut Nanun onj imado ya, in pris pempem san imado da.

⁴ Anj Melkisedek yajan tubun an ale. Abraham idsad tubud baged malan inug ak, yu san biounj isini an itarpaleg malan 10 gug malan kisaek inaneg Melkisedek ipani a. ⁵ Ru ta Moses san kubiaen ilon lo yen dan ago ibol, Livai san malan kubulan a pris urat dijanane yan tamolpein sad melmel aenta dijanane wa. Tamolpein an ihsad biounj ditarpalep malan 10 gug malan kisaek dipidinai a. Ago dugo gidad teid muroudi agod

Abraham tubun muroun bo man dam mi a. ⁶Ak man tamol Melkisedek an Livai san gugoi lo kisaek tia ya, ago yak bo man Abraham biourj itumanig malan 10 gug itarpaleg malan kisaek Melkisedek ipani a. Melkisedek biourj an injaneg tamol a Anut san promis yabi dan bar ipani a. ⁷Id talonj uyan ak tamol lak na yan bar tamol paen na yan ipani wa. ⁸Amaiak ninjen o dal ta igo ya, tamol e Livai san gugoi lo dilasa yan binawek diñane bo man inj dumat da. Ak man dal turan lo, tamol Melkisedek inj dam binawek injane ya, gug girek en lo ibol inj pempem imado yau onj da. ⁹Ru ta dam nap talpein ka igo ibol a, Livai injen, tamolpein sad binawek injane dan, gidad inj gamugo ilasa bo man binawek Abraham banin lo Melkisedek ipani a. ¹⁰Man dugo, saen Abraham Melkisedek itumani ante man, Livai inj bagen Abraham tinin lo imado se ya.

Jesus ibol Melkisedek onj a

¹¹Aria, pris adi a Livai san gugoi lo dilasa yan sad urat man kubiaenj a Anut tamolpein ipidinai an san fun. Tamolpein pris an sad urat an lo inj itaot mok ak dilasa tap, anta wo pris foun ak ta ilasa wo Anut imat di? Pris naok Aron san ago tia ya, tia, Melkisedek san ago mi a. ¹²Aria, pris san urat awan lo bileksak yen tap man kubiaenj dam lo bileksak yen a. ¹³Tamol a manj ninjen o minijenj den man inj gugoi senamo ak san a. Ak man talpein ta gugoi an san, pris sad urat alta fufo igane man tia ya. ¹⁴Id kuai tem talonj uyanan ak idsad Tubun en man inj Juda san gugoi lo ilasa ya. Agod gugoi amaiak mi ninjen o Moses pris niñedi wo ru ta ibol man tia ya.

¹⁵Mel manj ninjen o minijenj den ru binawek lo kuai isi geig a. Alonj uyan a. Gamu pris naok sen ak Melkisedek onj ak ilasa ya. ¹⁶Inj pris san kob injane ya, kubiaenj ta gugoi dugon lo inj ilasa yan lo kob ta injane na ya, tia, kumaen dipitiñini san tia yan san dabai lo mi a. ¹⁷Man dugo, ru en girek lo inj ninjen o ago ibol,

“Onj pris pempem mado geig a,
nek pris naok Melkisedek ago mi onj dam ago wa.”

¹⁸Dal ta lo, kubiaenj malan malan mi an Anut patun fo igane ya, man dugo, kubiaenj an dabai an tia yak, agod nuñon an dam tia ya. ¹⁹(Man dugo, kubiaenj an mel ta itaot mok ak igane ilasa san tia ya.) Dal turan lo, ilo rumok uyanan nuñon anda yak ikubiai panad a, an lo Anut sinjiren na tau a.

²⁰Saen Anut ago igane yan lo injsinanen ru dabai ipani a. Pris an Livai san gugoi lo dilasa yan, talpein ta ru dabai ipani man tia yan lo gidad pris dilasa ya. ²¹Ak man tamol a ninjen o mabol la yan Anut injsinanen ru dabai ipani an lo pris ilasa ya. Man dugo, Anut irupeig igo ibol,

“Tubud injanen ru dabai ipani la ya,

agod in ilon ta ibilisa na wa.

On pris pempem mado geig a.”

²²Fun an nigen o Jesus man kontrak foun an san balsijanek, agod kontrak an kontrak wagam an irijani a.

²³Pris wagam san an wei mi a, man dugo, maten yabitanai, an lo urat digane yau san tia ya. Fun an nigen o pris foun ak pris dumat ak sad abed dijane se ya. ²⁴Ak gug Jesus man pempem imado yau da. An nigen o pris san urat man nek ago mi igane yau on a. ²⁵Ago yak nigen o tamolpein a in lo Anut sumeik dupani dan patud ipasi pasik anen idaisuda ya. Man dugo, in pempem imado dan nigen in waged lo Anut igudani da.

²⁶Pris gurman naok ago yak id lo uyan a. In saian aman tia ya, in gun, ikok, in tamolpein aupasek adi an sijired na dam tia ya, agod Anut yabisag kumaen panu lo lak na isuda geig a. ²⁷Nal wei mi pris aenkadi Anut yai digane pani da, malan malan in sinad aupasek dusuas san yai digane gup tinin te man tamolpein sad yai digane da. Ak man Jesus man in ago tia ya, in in sen tinin amaiak ibiseig nal kisaek tamolpein fidian nijedi wo aigim fo imat a. ²⁸Rumok, kubiaen in tamol dabai amad tia yak ipilianai pris gurman dilasa wa. Ak man saen Anut in ru rumok lak na ibol an kubiaen an patun fo igane ya. An lo Anut ru rumok a ibol an lo, in anen Nanun ipilianig pris gurman ilasa ya. Agod Anut in anen Nanun iganeg itaot geig ilasa ya, nek ago mi pempem imado wa.

Jesus idsad pris malan te ya

8 ¹Man ru mabol dan man mel malan te igo ya: rumok, id pris gurman uyanan ago yak amad da ya. In kumaen panu lo Tubun Geig ak san badim sijiren na banin won ak lo imasig imado da. ²Agod in Anut san ubou ab rumok ak lo pris san urat igane da. Ubou ab an man tamol ta dususe na ya, tia, Anut sen mi isuse ya.

³Pris gurman fidian dipilianai dan in tamolpein aned ilo uyan anan Anut yan lo mel an dupani da. Agod in aned aupasek dusuas yau san mel mudan man Anut yai digane pani da. Fun amaiak nigen o gamu pris foun ak dam mel ta naon ago mi Anut ipani wa. ⁴Aria, in tan en san tamol tap man in ta pris ilasa na wa. Man dugo, pris wei mi tan en lo dumado la yan, Anut san kubiaen kagin dupani dop yai digane pani se ya. ⁵Ubou ab a tamol, lo Anut urat digane dupani dan man kumaen panu anen ubou ab san mitilaen igo ya. Fun amaiak nigen Moses Anut san ubou ab isuse wo igane dugo, Anut irupeig igo ibol, “On hai did fo na ru kagin jurupaio dugo ilo sou nukubiai pano yan lo, mel fidian gane ilasap itaot a.” ⁶Gug gamu pris san urat Anut Kristus banin lo igane yan man uyanan geig a. Man dugo, in kontrak uyanan ak san titigae tamol igo ya, agod kontrak an kontrak wagam ak irijani a. Ata wo, kontrak foun an

san bag man Anut anen promis uyanan, an lo wagam an dam san nujon irijani a.

⁷Kontrak wagam an lo muruan tia yak man kontrak foun ak ta ilasa san tia wa. ⁸Man dugo, Anut tamolpein ilod lo saian ile ya, amaiak ninjen o,

“Tubun en ibol, aloŋ ak, saen ipalu dan te dop
ŋai Isrel tamolpein iŋ Juda tamolpein dadi kontrak foun ak mususe
wa.

⁹Agod kontrak en man ŋai Isrel tubud baged dadi mususe ago tia ya. Saen an lo man ŋai banid te ŋibiaig ŋaŋal go Igipta tan mubiseig mupalu ya.

Man dugo, iŋ ŋaisag kontrak an mi kagin dupanip ta diabi se na ya. An ninjen o ŋai patug ŋipidinai a.

ŋai Tubun en ago ŋabol a.

¹⁰Saen an ilasa dop, kontrak en ŋai Isrel tamolpein lo ŋigane wa. ŋaisag kubiaen an kabuŋad lo ŋidiri wak, agod bubedi lo dam ŋigire wa.

ŋai man iŋaned Anut, agod iŋ ŋaineg tamolpein a.

¹¹Nal en lo ta lulugad lo turan boi, tia, tein boi, ipiteŋanip ibol, “Tubun en ulon,” an ago ta ibol na wa.

Man dugo, iŋ fidian ŋai dulon uyanan a.

Tamol yaŋad tia yan, agod tamol yaŋad anda yan, dam fidian ŋai dulon a.

¹²Man dugo, ŋai iŋaned aupasek an ŋupasi yau a, agod ŋai iŋsad muruan an ilog isou san tia ya.”

¹³Aria, Anut kontrak foun ta ninjen o iŋiŋen dan fun man iŋsan ilo sou lo kontrak malan malan an man wagam san a. Agod mel ta wagam an la yak, an saen katukan mi yen pe itout yau a.

Tan en san ubou ab lo ubou leil san kagin

9 ¹Aria, kontrak malan malan an lo ubou leil san kubiaen yen a, ago dugo tan en san ubou ab ta dam yen a. ²Ubou ab ta dususe ya. Galuŋ malmalan an lo lam ta, badim da, agod badim an fo bret Anut naon na didirig dien dan mi ante dien da. Galuŋ an Aben Gun ak ago dubol da. ³Aria, galuŋ an patun fo man yamel dalawan te dususe ya. Yamel amaiak patun fo man galuŋ taida yen da, galuŋ an Gun Di, Gun Mok ago dubol da. ⁴Galuŋ en ilon lo alta ta gol nam diganeg yen da. Alta an fo man pawra mumalun bulbal ak sen nam yai digane da. Agod kunup kontrak an dam gol nam dubuluwig yen da. Kunup kontrak an ilon lo, bod gol a mana aman da yan, Aron san makud a balun foun ak idiri an dam, agod Anut san kubiaen pat aten uyan ak uraru fo na igire an dam, kunup an ilon lo dien da. ⁵Kunup an fufo na Anut san ilo muŋanek aben

yen da, agod an gigin ananaem mi Girager san enjel uraru mi mitilaed dututunanai an subarid duwate yaug Anut tamolpein ijaned aupasek ipasi yau ak san aben amaiak dutuanig dutur da. Ak man gamu mel an man fun fidian mabol dop alonj san tia ya.

⁶Mel an fidian ago digane itout a, ago gup murna pris adi galuj malan te yan lo diladup ijaned urat awan an digane yau onj a. ⁷Ak man pris gurman mi in galuj tinin te an ilon lo iladu wa. In anajar kisaek ilon lo nal kisaek atem galuj an ilon lo iladu da. In pempem dar ijane iladup ijsinan aupasek agod tamolpein njeo lo kagin sisaik digane na yan, dam fidian ipasi yau wo Anut ipani da. ⁸⁻⁹Kulob en fidian lo ru fajan yen da. Mel an lo Awan Urgun kuai tem ikubiai tile ya, saen galuj malan te urat anda ago itur se man, galuj Gun di, Gun Mok san dalawan an itaug yen se ya. Man dugo, dalawan san yamel amaiak dal ifutani a. Galuj malan te man kontrak wagam san saen, an naon ijane ya. Ubou leil ab an ilon lo Anut ilo uyan mel dupani dop yai digane pani se ya, ak man mel an talpein ntun ibinawip ikok ilasa san tia ya. ¹⁰Melmel an man sen kubiaen ibol ago anaj nuaen, you lukluk agod fulanek funfun digane dop lo ikok dilasa san mi a. Kulob en man tinik fufo yak san mi a, ago digane yaup melmel foun ak dilasa wan san saen ilasa wa.

Kristus san dar

¹¹Ak man saen Kristus ilasa yan, in melmel uyan uyan a dilasa la yan, sad pris gurman onj ago imado ya. Saen an lo in galuj Gun Di, Gun Mok a uyanan geig agod itaot mok a tamol banid nam ta dususe na yan, ilon lo iladu ya. Galuj an tan en san tia ya. ¹²In nal kisaek o lian mi galuj Gun Di, Gun Mok an ilon lo iladu ya, agod dar a ijaneg ida iladu yan man bilelek boi, tia makau nanun ta boi san dar tia ya, tia, an ijsinanen dar mok a. An nijen o id injiliad tamul pe ijsan na pempem tumado yau san dal ipasi a. ¹³Dugo, pris adi bilelek sad dar, makau nanun tamol sad dar, agod makau nanun pein ak san tatu, an dijane go tamolpein a, Anut malan lo ilod ta ikok na yan, sad tinidi fufo dufurfi go gun dilasa ya, an lo tinidi ikok ilasa tap, ¹⁴Kristus san dar sapta taida mip dabai ak i? Ur pempem san dabai lo, Kristus ijsen ijanen tinin a muruan aman tia yan dufuni imat pe mel mudan yai lo digane yak igo wonj Anut ipani a. Kulob an lo ijsen mi idsad ntud ibinawig ikok tilasa ya, an lo idsad ntud lo kagin a sad nujon a lo materj tile dan ipasi yau a, an lo id Anut kumaen imado dak mi ubou an tile wa.

¹⁵Fun amaiak nijen o Kristus in kontrak foun en san tamol titijae ak igo imado da. An lo talpein ensauta a Anut ipilianai ak mi, in kumaen pempem san melmel dijane san ipilianaig yen dan dijane wa. Man dugo, materj a ilasa amaiak lo, tamolpein kontrak a wagam paen na dumado dugo aupasek digane na yan patud ipasi a.

¹⁶Aria, materj kontrak san girek (pepa) ta yen tap, an man urat aman tia ya. Man dugo, tamolpein ij girek muroun imat an dile duloj gup, girek an urat ka dupani wa. ¹⁷Kontrak girek an materj san saen lo mi dabai anda. Man dugo, saen girek muroun malan kumaen lo imado se yan, girek an kawan igo ya. ¹⁸Fun an lo na wagam mel mudan dufu na yan sad materj san dar amaiak kontrak wagam an dabai ipani na ya. ¹⁹Saen Moses tamolpein naod na kubiaen an fidian ifulale idug itout an, ij makau nanun bilelek da sad dar ijaneg you da ibileksa ya. Ago gug yang ai hisop raen ta kam daran ak bilelek fufulun sen nam dufou yan ijaneg dar lo isamuni, ago gug ijaneg ifurfi buk fo na isida gug fon tamolpein fidian sad na ifurfi yau a. ²⁰Ij ago irupidai, “Dar en kontrak dabai ipani san, nek emaiak niijen o Anut ru kagin ipanaj a.” ²¹Kulob nek a igane ago mi dar an ifurfi ubou ab an fo isudag, ubou leil san mel an dam fidian fo ifurfi isuda ya. ²²Rumok, kubiaen paen na, mel wei mi dar nam ikok digane ilasa ya. Agod dar ta ikulmaek yau na yak man aupasek dam ta isuas yau na wa.

²³An uyan ak kumaen panu san melmel anen mitilaedi an naok naok ago lo ikok dilasa da. Ak man kumaen panu san melmel ijsedi, naok naok a aenta irijanai dan nam ikok dilasa da. ²⁴Man dugo, Kristus ij tamol banid nam galuj gun mok dususe yak lo ta iladu na ya. An man galuj mok ak san tutujanek mi a. Tia, kumaen panu mok lo iladu ya. Gamu ante id nijed o Anut naon na imado da. ²⁵Taida mi, ij saen wei mi ijsen tinin ipani wo igane man tia ya, nek ibol pris gurman galuj Gun Di, Gun Mok ak lo anajar kisaek kisaek lo dar a ijsan tia yan da isinip iladu dan ago ta igane na ya. ²⁶Ago tap, saen Anut tan en igane ilasag ipalu an lo Kristus nal wei mi madai ile wa. Ij ago ta igane na ya, tia, nal kisaek o lian saen wadan lo ilasa ya. Ijsinanen tinin ipidinai an lo aupasek ipasi yau san igane ya. ²⁷Anut ibol, tamolpein nal kisaek mi dumat a, ago gup Anut naon na bitinaek lo dutur a. ²⁸Nek ago mi, Kristus dam nal kisaek dufuni imat a, an lo tamolpein wei mi sad aupasek isini a. Ij ago igane dugup afon imul ipalu da wa. Aupasek isuas yau san ta imul ipalu da, tia, tamolpein a ij o mala nouk dumado dan patud ipasi ipidinai o imul ipalu da wa.

Yai niganag wagam man aupasek ipasi san tia ya

10 ¹Kubiaen man mel uyan uyan murna dilasap dupalu wa, amaiak sad mitilaedi mi a. An man mel nujon tia ya. An lo tamolpein Anut anajar fidian yai naon kisaek anam digane pani dugo sijiren na diau dan, kubiaen ikubuniaip itaot mok dilasa san tia ya. ²Dugo, kubiaen tamolpein itaot mok idirai dilasa la tap, Anut yai digane pani se yan afon digane da wak i? Man tia geig a. Fun an niijen o, ubou leil san tamolpein saen kisaek atem ikok mok dilasa pasik tap, ilod lo aupasek ta

afon dukubiani san tia ya. ³Ak man tia, iñsad yai niganag en man anañar fidian ago digane dop lo iñaned aupasek an ilod isou da. ⁴Man dugo, makau tamol ak iñ bilelek da sad dar man aupasek ipasi yau san tia ya.

⁵Fun an niñen saen Kristus tan na ipalu yan Taman irupeig ago ibol,
 “Iñ on yai digane dupano wo, agod lou kawan ak dupano wo do umoi a.
 Ak man tinik ta on gubak mi kubuneg ñai panag a.

⁶On tamolpein nao na dilasa san yai niganag,
 agod aupasek isuas san mudan dam niñedi wo bube ta uyan na ya.

⁷Agog ñai ñabol, ‘O Anut mala ipalu, ñai ebo ya,
 nek ibol Anut san ru girek buk lo niñeg o ibol ago mi a,
 ñai man onjane ilobol ñigane wo ñupalu ya.’ ”

⁸Aria, malan malan iñ ago ibol, “Tamolpein iñ on niñe wo yai niganag, lou kawan an, mudan tinid fidian dimari dan, agod aupasek san yai niganag digane dan niñedi wo fidian umoi da.” (Gug kubiaen ibol kagin naok an tamolpein ago digane wa.) ⁹Iñ ru awan ibate dag ibol, “Ñai ebo ya, ñai man onjane ilobol ñigane wo ñupalu ya.” An lo na iñ dal wagam an ipasi yau dugo dal foun ak aben lo igane ya. ¹⁰Agod ilobol an lo, Jesus Kristus saen kisaek o lian iñsen tinin dufuni imat san o Anut ipani a, an lo id gun tilasag tumado da.

¹¹Nal kisaek kisaek atem pris dumasa dutur pe yai ganek aben na iñsinad urat awan saen wei mi digane da. Iñ mel mudan naon kisaek an mi nal pempem Anut yai digane pani da. Ak man yai ganek naok an tamolpein sad aupasek ipasi yau san tia ya. ¹²Ak man Kristus nal kisaek mi lo sen tinin Anut ipani a. Kulob an nuñon pempem yen da. Saen kulob an igane itout man yaug Anut banin won ak lo imasig imado da. Man dugo, iñsan urat itout a. ¹³Gamu iñ mala naok imado yaup saen Anut iñsan ager adi dabai amad tia yan iñal pe ñien paen na idiraip dumado wa. ¹⁴Man dugo, iñ saen kisaek mi sen tinin Anut ipani an lo, tamolpein a gun idirai dilasa dan ikubuniaig itaot mok pempem san dilasa ya.

¹⁵Awan Urgan dam mel an niñen o ikubiai ipanad go ago ibol,

¹⁶“Saen an ilasa dop, kontrak en ñai Isrel tamolpein lo ñigane wa.
 Ñaisag kubiaen an bubedi lo ñidiri wak,
 agod kabunad lo dam ñigire wa.”

¹⁷Agog iñ ru awan ibateg ibol,

“Ñai iñsad aupasek agod iñsad kagin saiak saiak dam ilog isou san tia ya.”

¹⁸Amaiak niñen o, saen kulob an Anut isuas yau tap, aben ante aupasek san yai niganag taida yen man tia wa.

Tatur dabai san ru kagin

¹⁹Fun an lo na, teig taog, id Jesus san dar lo Anut san galuñ Gun Di, Gun Mok an ilon lo tiladu wo tarer san tia ya. ²⁰Dal a tiladu san an foun,

agod kumaen yen yau san a. Yamel an id tiladu san dal ifutani a, ak man Jesus lo yamel an isireig dalawan id ipasi panad a. Yamel an inſen tinin amaiak naon inſane ya. ²¹Agod id pris tubun malan te yak amad da ya, in Anut anen tamolpein an fidian kagin ipidinai da. ²²Fun uraru an niſen o id Anut siſiren na ilod siſaokan mi tau a. Agod idsad ilo rumok idaisuda amaiak niſen o inſiliad san o tinid tigane wa. Idsad ilo sou saian saian an tiſanep inſan na tau, ago gup Kristus san dar ifurfip idsad ilo sou saian saian an isuas yau pasik a. Agod idsad tinid an you uyan ak lo ifulanip ikok ilasa wa. ²³Id Anut inſiliad pe kumaen panu lo, in da tumado wak san ilo rumok an niſen tamolpein turupidai duloſ dan ta tabip ila iso na wa, tia, tabi sakar pe itaot yen a. Man dugo, Enti a ru ibol panad an, inanen promis ru nuſon igane ilasa wa. ²⁴An niſen id nug ilo sou tupanip nug tiſuſuſani dop nug niſen tamat dop urat uyan uyan ak tigane ilasa wa. ²⁵Aenta ubou leil san kagin ſiſem dutumani san o dumoi da, ago gug id kagin an ta tagam tiſane na wa. Tia, aſ tan ſuek ru nug apani wa, Tubun en imul ipalu san Nal ſumeik ipanaſ o ale dugo, kagin naok ago yan aſ luluſam lo agane ilasap tubun a.

²⁶Id Kristus san ru rumok taloſ la gug id aupasek tigane ilasa woſ dan, id o mel uyan ak taida yen pe lo idaned aupasek ipasi yau san tia ya. ²⁷Tia, tarut tarer dop, lo malad tigane dop tumado wa, man dugo, Anut san bitinaek agod yai wananan a inſan ager imiriaſ inanai yau san idsad na dam ago ilasa wa. ²⁸Talpein enti Moses san kubiaenſ patun ipani dugo tamol uraru boi, tia utol boi, inſan kagin an malad nam dile tap, tamolpein fidian dufuni imat a, agod in ilo muſanek ta dupani na wa. ²⁹Amaiak niſen o dugo, talpein Anut Nanun yaſan ipare idu dop, kontrak san dar a iganeg gun ilasa yan mel kawan ago ile dop, ilo panek san Ur an awan nam saian ipani a, ago tap, muruan tubun geig ak sapta taida Anut ipani wak i? ³⁰Man dugo, id taloſ uyan ak talpein a igo ibol, “Naon panek man ſaineſ a, ſai gubun an ſukubune wa.” Agod afon, “Tubun en inanen tamolpein bitinaek lo idirai a.” ³¹Rumok, Anut kumaen pempem san banin lo tau tadu tap, an tarut tarer san mok a.

³²Aſ ſaen gubak mi lilaman aſaneg, an lo atur sakar dugo muruan funfun tinim fo ipalu dugo asini na yan, aſ ilom isou uyanan a. ³³Saen aenta lo aſ malak malak dugunaſ pe naom dufuteg dumisilanaſ dop muruan dupanaſ se ya. Agod ſaen aenta man aſ aenkadi in luad te dida atumanig, muruan nek ago mi saian geig ak dupidinai se yan, aſ dida asini na ya. ³⁴Aſ tamolpein a subanek ab lo dumado dan sad na au dop ael se ya. Agod ſaen aſſam filiam duſu diau dop aſ ilo uyan lo mi aelafu oſ se ya. Man dugo, aſ aloſ ak aſanem mel uyanan ak man kumaen panu lo yen da, an mi pempem yen a.

³⁵Fun an niſen o aſanem tini ganek Kristus lo yan abal yau amoi. Man dugo, Anut mel an naon tubun ak ipanaſ a. ³⁶Aſ atur sakar oſ amado

dan uyan a. An lo na Anut san ilo ibol ari dop mel a inj ipanaŋ o ibol an aŋane wa. ³⁷Man dugo, Anut ru igo ibol,

“Saen katukan en yau dop, talpein ipalu wo igo yan ipalu ririan a, agod inj saen ibidani san tia ya.

³⁸ Gug ŋaisag tamol itaot an ilo rumok lo mi imado wa,

gug inj isuk imul tap, ŋaisag ŋutug lo inj o man ilog ta uyan na wa.”

³⁹ Ak man id tamolpein a dusuk dumul pe daon diŋane dan sad tia ya.

Tia, id man tamolpein a ilo lo rumok, an lo iŋaned ŋutud dida kisaek mi dumadon lo daon ta dile na dan nek ama ya.

Ilo rumok lo mi a

11 ¹ Aria, ilo rumok man igo ya, mel a niŋen o tinid tiganeg tumado dan id talon ak an ilasa wa, agod mel a ta tile na yan niŋen o ilod rumok a. ² Ilo rumok an lo tamol wagam dumado na yan malak malak lo Anut per ipidinai a.

³ Ilo rumok lo mi, id talon ak Anut san wagiŋ lo mel fidian idirai dilasa ya, an lo mel tile anen tia yan lo Anut iŋaneg idirai dilasa ya.

⁴ Ilo rumok lo mi, Abel Anut yai uyanan igane pani, agog Kein san iriŋani a. Inŋsan ilo rumok amaiak lo Anut inj yaŋan yabisag tamol itaot ak ibol a. Anut inŋsan yai ganek an uyan ipani an lo ikubiai panad, inj tamol itaot a. Agod ilo rumok nek an mi lo, gidad inj imat la bo man, gamu id ru irupaiad on da.

⁵ Ilo rumok lo mi, Anut Inok tan en lo ipasig kumaen panu na iŋane yau, an lo materŋ ta ile na ya. Agog Enok naon tan en lo ta dile na ya, man dugo, Anut iŋane yau a. Gamugo iŋane yau se man, Anut inj o ilo uyan yen dan ago irupidai a. ⁶ Rumok, ilo rumok a tia man Anut ilo uyan pani san ta idaisuda na ya. Man dugo, talpein enti Anut siŋiren na yau o dop, malan malan mi Anut imado on dan o ilon rumok a, agod inŋsen amaiak talpein inj o aban ile dan naon ipani wa.

⁷ Ilo rumok lo mi, Noa Anut san ru kagin panek ilon a, an lo gidad mel an ta yil na ya, ak man Anut san awan aban an irig kagin ipani dugo wog tubun geig ak ifoug, ate iŋanen tamolpein ibinawai a. Inj ago igane an lo tan san tamolpein patud ipidinaig iŋaned aupasek iŋaneg walal te ilasa ya, agod ilo itaot an man ilo rumok igane ilasa dan anen muroun ilasa ya.

⁸ Ilo rumok lo mi, Abraham Anut san wagiŋ ilon go iŋanen panu ibiseig tan foun an san muroun ilasap imado wan ate Anut ikubiai panig yau a. Inj gidad tan an ta ilon na yak gug Anut awan irig ate yau a. ⁹ Ilo rumok lo mi, inj tan a Anut ipani wo irupei ante yaug san muroudi siŋired na dida dumado ya, nek ibol tamol gol imado won a. Aisak inj nanun Jakob da nek dal kisaek an mi lo Anut san promis dam diabi a. Agog inj Aisak Jakob da sisem sel ab lo dumado na ya. ¹⁰ Man dugo, inj ilo isou imug

iganeg yau dan, taun tubun ak lo bag ila iso san tia yan te yau o da. Taun an san ab susek tamol man Anut mi a.

¹¹Ilo rumok lo mi, Abraham gidad tubun bagen dilasa pasik go Sara dam niganig, ak man Anut Abraham nanuk foun ak taman ilasa san o dabai ipani a. Man dugo, Abraham san ilo rumok igo ya, enti a promis ipani an san n̄in̄en an kagin ipani wa. ¹²Amaiak n̄in̄en o tamol a kisaek lo mi, amaiak imat o igane bo man, iñ tubun bagen dilasag ibol patui lak na teil dak igo, agod loñ na lul igo woñ a. Ago man tusuti san tia ya.

¹³Tamol en fidian ilo rumok lo dumado yang dumat a. Iñ Anut anen promis ru irupidai an n̄un̄on ta diñane na ya. Tia, iñ ibol asau mi dutur dugo malad yang dile dugo an n̄in̄en o ilodi uyanan ak igo ya. Agod tan en lo iñ nek ibol tamol gol boi, tia, tamol naod senamo boi, igo woñ dubol dugo dumado na ya. ¹⁴Tamolpein ru ago dubol man kuai tem dukubiai panad ak iñsiganed panu foun ta n̄in̄en o abañ dile da. ¹⁵Iñ tan a dubusei la yan n̄in̄en o ilod isou ak man saen idaisuda yen dan lo iñ ka dumul diau a. ¹⁶Ak man tia, iñ tan senamo ta a dibisei la yan iriñani dan n̄in̄en o dumat da, an man kumaen panu san mi a. Amaiak n̄in̄en o Anut tamolpein a iñ n̄in̄en o iñsad Anut ago dubol dan, iñ niñedi wo miai ta ifuni na da. Man dugo, iñaned taun tubun ak ta ikubuneg yen da.

¹⁷Ilo rumok lo mi, Anut Abraham bitinaek lo igane dugo Abraham Anut awan yabig, nanun Aisak yai igane pani a. Tamol en iñ Anut san promis iñane yak gug, iñ nanun kisaek mok an Anut yai igane pani wo igane da. ¹⁸Ak man nanuk an n̄in̄en o Anut Abraham irupeig ago ibol, “Ñai Aisak kob n̄upani an lo iñ tinin lo gup, oñane bage murou sad dar wei mi dilasa wa.” ¹⁹Abraham iñ ilon lo Anut Aisak maten lo ifufuni yabisa wak ago ibol a. Ago yak n̄in̄en o id mitilaen an n̄in̄en ago tabol, Abraham nanun Aisak maten lo iñane da ya.

²⁰Ilo rumok lo mi, mel a murna dilasap diñane wan niñedi wo Aisak bar Jakob iñ Esau da ipidinai a.

²¹Ilo rumok lo mi, Jakob imat o dugo Josef nanun muroun kisaek kisaek bar ipidinai a. Iñsinanen makud fo kabuñan isoluwig igudani a.

²²Ilo rumok lo mi, Josef san saen wadan sumeik ipani dugo Isrel tamolpein saen a iñ Igipta tan dubuseip dilasa san n̄in̄en o iñanen tatu an dugon te digane wak san ru kagin irupidai a.

²³Ilo rumok lo mi, Moses ilasag saen katuk imado gug tinan taman diñane diaug dimianig kalam utol imado ya. Man dugo, iñ dile yak man malad lo uyanan mok a, agod kiñ san ru dabai anda yan n̄in̄en o dam ta direr na ya.

²⁴Ilo rumok lo mi, Moses saen tamol igane man iñ Farou nanun pein san nanuk ago dubol man imoi a. ²⁵Iñ gidad Anut anen tamolpein dadi Igipta paed na muruan isini wo igane ya. Iñ tan na saen katuk an mi aupasek igane dop sen ifutuwi man imoi a. ²⁶Iñ misilanek Kristus yañan n̄in̄en o ile man

Igipta sad bala filian an fidian irinjani pasik an ibol a. Man dugo, iñsan ilo isou imug yau an lo iñsan urat naon ile ya. ²⁷Ilo rumok lo mi, kinj san tiñae saiak o ta irer nag Igipta ibiseig yau. Man dugo, enti a id tile wan tia yan inj ile yak igo an lo itur sakar na ya. ²⁸Ilo rumok lo mi, inj Pasova nal an san kulob an yabituani dugo dar ifurfi a, an lo eñel ager san ta Isrel sad nanuk matu ak irinjani dugo yaug Igipta sadi an mi ifu dumat a.

²⁹Ilo rumok lo mi, Isrel adi beig daran ak titiñae dudug ibol tan aten igos ak ate diau wonj a, ago gug Igipta adi nek dal kisaek an mi lo digane wo dugo disarir dudu diaug you duluk go dumat a.

³⁰Ilo rumok lo mi, Jeriko panu san ar pat nam dufou itilani an, nal 7 Isrel adi ditilianig ditor an lo ar an sen ibilani yau idu ya.

³¹Ilo rumok lo mi, jeit pein Rahab, ilo maror lo abanj leil tamol adi uyan ipidinai an niñen o, panu an san awa parsisalek adi luad te ta dufuni imat na ya.

³²Agod gamu fon ñai dugo ñabol ak i? Ñai Gidion, Barak, Samson, Jepta, Dawid, Samuel agod profet adi dam niñedi wo ñabol san saen tia ya.

³³Tamolpein amaiak inj Anut ilod lo rumok a. An lo na inj kinj aenta dibiai dudu dak, aenta tamolpein kagin dipidinai dak, agod aenta inj Anut mel ipidinai o ibol an diñane da. Aenta inñaned ilo rumok an lo na inj laion awad dufutani da.

³⁴Aenta yai balen tubun mi ided dan digane imat dak, aenta dusol dop sabiri nam dufu dumat san tia ya. Ilo rumok an lo, aenta inj dabai amad tia bo man dabai diñanep, yu lo inñaned ager aben senamo ak san an dibiai dudu se ya.

³⁵Pein inñaned nanuk dumat an ilo rumok lo profet inñaned nanuk an ifufunai dimasag diñane ya. Aenta dufu malad dusue yan malak malak sed kuai te idirai dilasa man dumoi a, man dugo, mitep matenj aben lo dumasa gup madok uyanan ak iñsad turenj tan en lo irinjani an dile wa. ³⁶Aenta kukok ad digane dugo, aenta dusukutai dugo, aenta sein nam banidi dususeg diriai subanek ab lo diau a. ³⁷Aenta pat nam dufu dumat dugo, aenta soa nam dututeg ananaem dilasa dugo, aenta bainat nam dufu dumat. Ilo rumok tamolpein an bilelek sunjulon an tinid nam dubuluwig dutor da, inj melmel ad tia agog tamolpein saian dupidinai dugo malad dusue na ya. ³⁸Ilo rumok tamolpein an aben igosan ak lo, did lo gidigheid dutor dugo, gib did fun te agod gib tan ilon lo an lo ñionj diabi se ya. Tan en san tamolpein dida dumado san ta idaisuda na ya.

³⁹Tamolpein an fidian inñaned ilo rumok niñen o Anut per ipidinai a. Ago igane bo man iñsad kisaek ta Anut promis ru ibol an lo mel an ta inñane man tia ya. ⁴⁰Man dugo, wagam mok Anut mel ta nen uyanan ak idsad saen an lo ilasa wan ile ya. An man tamolpein an id tia yak man itaot dilasa san tia ya, tia, inj id da sisem itaot tilasa wa.

Anut iñsan nanun muroun bu ipidinai da

12 ¹Fun an niñen o ilo rumok tamolpein adi dumat la yan nek ibol doup malan tubun ak ta dilasap kukok dile dak ago id ditilianad dulubana

go dutur da. An lo id iṣṣad kagin dutur sakar san an tagam a. Fun an niṣen o id muruan iṣ aupasek da tinid lo ibiagatad go yen dan fidian tabi yau a. Ago dop id ilod kisaek sed dabai ipanad pe dal an fo Anut tom idiri panad an lo mi tumaspalup taup tom wadan an fo tisida wa. ²Id fidian malad yaup Jesus tile, iṣ mi idsad ilo rumok fun a, agod murnap iṣ mi idsad ilo rumok an iganep itaot mok ilasa wa. Iṣ aigim an san muruan ileg an patun ta ipani na ya. Tia, iṣ murnap Anut ilo uyan tubun mi ipani wan niṣen o aigim san miai an man mel kabelan igo woṣ ile ya. Ago yak niṣen o gamu iṣ Anut banin won ak ate yaṣak tubun ak iṣaneg imado da.

³Ilom isou uyanan, aupasek adi dumisilani dop muruan funfun tinin fo digane se ya, ago yak man iṣ itur sakar a. An niṣen o kabelan aṣ ilom iyalis dop ilom idu banau.

⁴Rumok, aṣsam aupasek an da nug afuni da, ak man wagai agane dan lo aṣsam dar an gamugo ikulmaek da. ⁵Agod en dugo, aṣ Anut ru kagin a irupaiaṣ na yan lo iṣsan nanun muroun ago ibol an ilom iṣaon di?

“Iṣai nanug, Tubun en bu ipano dan kabelan mel kawan ubol banau, agod an niṣen o on ilo idu umoi.

Man on mel gane saian amaiak niṣen o naon bu ipano da.

⁶Man dugo, Tubun en iṣ talpein niṣen o imat mok dan ru kagin irupei dak,

agod talpein a iṣ nanun muroun igo woṣ iṣal dan bu ipidinai da.”

⁷Kagin ipiteṣananṣ san niṣen o muruan lo atur sakar a. Iṣ ago igane dan lo iṣsan nanun muroun igo woṣ kagin ipanaṣ da. En dugo, nanuk ta lulunad lo imado dan iṣsan taman bu ta ipani na i? Man tia geig a. ⁸An niṣen aṣ Anut bu ta ipanaṣ dop man, aṣ iṣsan nanun muroun tia ya, tia, aṣ man jeit kagin san nanuk mi igo woṣ a. ⁹Fon taida mi, id fidian tamad muroud bu dupanad da, agod id an niṣen o ilod ta saian da. Tia, kulob amaiak niṣen o id iṣaned awadi turi da. Ak an ago tap, id dam idsad ur san Tamad an awan paen na tumado dop an lo kumaen tumado wa. ¹⁰Iṣsed ilod ibol ak lo saen katukan en lo mi bu dupanad da. Ak man Anut id ibinawad uyanan san niṣen o mi bu ipanad da, man dugo, nek ibol iṣ gun imado dak ago mi id dam gun tilasa wa. ¹¹Talpein bu iṣane dak saen an lo iṣ madai ilon da, an man siṣaokan tia ya. Ak man mite dugup amaiak tamolpein an kagin a lo dal ipiteṣanai la yan ilod lo nuṣon igane ilasa da. Nuṣon an man ilod itaot a, agod ilo maror amad da wa.

¹²Amaiak niṣen o aṣ banimi imagor dan abisa wa, agod turumi dabai tia yan dabai apani wa. ¹³Iṣiemi aten san dal itaot an akubune wa. An lo aṣ ṣiemi akupakip on ator dan san batek an ta ifurati na wa, tia, ṣiemi an uyan ilasa wa.

Aṣ Anut awan ta aparsisali san ru kagin

¹⁴Aṣ tamolpein fidian dadi ilom kisaek san maror lo mi amado ator, an niṣen o dabai agane wa. Agod gun alasa wo an dam yaes ifunaṣ a.

Talpein enti ago ta igane na tap, Tubun en ile san tia wa. ¹⁵Kagin agane, kabelan talpein ta aŋ luluŋam lo Anut anen ilo panek ipanaŋ an yabigule banau. Kabelan talpein ta, dulun gigen ak igo aŋ luluŋam lo isap, an lo talpein fidian bubed igane saian banau. ¹⁶Talpein ta jeit kagin ta igane na wa. Tia, ta ibol Esau igane ago Anut awan ta iparsisali na wa. In anan kabelan a tein bakan ak san na inane yan ninen o inanen nanuk matu ak san bar ibidani yau a, kabelan aŋ dam nek ago mi Anut patum apani banau. ¹⁷Man dugo aŋ aloŋ ak, murna gug inanen matu san bar a ibidani yau an fon inane wo igane ya, ak man Anut patun ipani a. Ago dugo in tinan igane bo man ilon ibileksa san dal ta ile man tia ya.

¹⁸Ak man nek ibol Isrel sad tubud adi did Sinai na dile yak igo won mel naok en aŋ ta sumeik apani na da: did a diabi dile o Anut naod ifutani an, yai balen tubun mi imasa dan, tidom tubun geig an, duwadau ifure dan, ¹⁹tour ilinan dan, agod awak ta man tamolpein a duloŋ an ru taida irupidai imoi o ago dumosiai an, mel naok ago yan sad na aŋ ta apalu na da. ²⁰Man dugo, ru kubiaen a ibol ilasa yan kududod lo madai ipidinai saian mok a. Agod ibol, “Gidad mel mudan ta did en yabi ile tap, pat nam afunip imat a.” ²¹Rumok, aban a ile yan san naon man urer san mok igo ya, an lo Moses ago ibol, “Ŋai ŋarut go ŋarer saian mok da.”

²²Gug aŋ did Saion fo na apalu ya, Anut kumaen imado dan san panu Jerusalem o keit lak na yen dan lo apalu ya, agod aben an lo man eŋel malan tubun pempem yousai lo mi dumado da. ²³Aŋ Anut san nanuk matu matu ak yaŋad buk lo igireg yen dan sad midaen ilon lo aladu ya. Aŋ Anut a tamolpein fidian sad bitinaek tamol an san na apalu ya, agod tamol itaot ak sad ur Anut idiraig itaot mok dilasa yan dam sad na apalu ya. ²⁴Aŋ dam Jesus san na apalu ya. Insen amaiak kontrak foun ak san titinae tamol igo ya. Abel san dar in naon panek o Anut iwagin a, ak man Jesus san dar a dufurfi an lo Anut san ilo panek o iwagin da, nek dar amaiak lo inŋan na apalu ya.

²⁵Kagin agane, enti in ininen dop awan ta aparsisali na wa. Tamol a tan en lo ru kagin irupidai dugo awan duparsisali na yan lo, muruan an dirinani man tia ya. Aria, Enti a kumaen panu lo imado dugo ru kagin irupaiad dan, id inŋan awan tiparsisali tap, tasol tau san tia geig a. ²⁶Saen Anut did Sinai fo idu yan lo inŋan wagin tan iganeg itugurer a. Ak man gamu in promis ru igo ibol, “Ŋai afon nal kisaek taida mi tan en ŋuguri wa, tan mi tia, tia, mel fidian lak na agod tan en dam sisem ŋuguri wa.” ²⁷Ru a “afon nal kisaek taida mi” an fun man, mel a iguri an ipasai yau a. An man mel a fidian fun lo idirai dilasa yan itout yau pasik a. An lo melmel a talpein ta iguri san tia yan ibisawaip pempem dien a.

²⁸Amaiak ninen o id aban a tamol ta iguri san tia yan ilon lo idsad kin kagin ipanad dan tinane ya. An ninen o id ilod uyanan a. Agod id kagin tiganep tarut dop ubou a Anut ilo uyan tupani san an mi tile wa. ²⁹Man

dugo, idsad Anut man ibol yai balen ided pe mel fidian inantiti yau dak igo ya.

Ru kagin san wadan

13 ¹ Añ kisaek kisaek pempem teim taom igo woñ nug niñen o amat a. ² Añ tamolpein asau ak añañ añañ ab lo apalu san ta ilom iñañ na wa. Man dugo, wagam tamolpein ta kagin an digane dan lo eñel iñsad ab lo kagin dupidinai uyanan gug ta duloñ na ya. ³ Añ ilo rumok tamolpein a, subanek lo dumado dan ilom isou dop amado wa, nek ibol añañ dam dadi subanek ab lo amado dak igo woñ a. Tamolpein a aenta saian dupidinai dan, an dam ilom isou wa, nek ibol añañsem iñsad muruan asini dak igo woñ ago abinawai a.

⁴ Nug iwon ñanek lulunañ lo man gun ilasa wa, nug iwon ñanek san badim an nun aman tia wa. Man dugo, Anut jeit adi iñ talpein a nug iwon ñanek malan dusue dam bitinaek lo idirai a. ⁵ Añanem tureñ lo moni niñen o yaes ta ifunañ na wa. Añ mel dugon am da yan, nek an idaisuda yak igo ilom isou wa. Man dugo, Anut wagam ago ibol,

“Oñ tini gane panag tap, ñai oñ patug ta ñupano na wa, agod oñ ñibisawo san tia wa.”

⁶ Fun amaiak niñen o, ru e id tabol ilasa den man ru rumok a,

“Tubun en man ñaisag binawek, an niñen o mel ta wo ñai ta ñarer na wa.

Dugo, tamol ta mel ta lo dam ñai ifunañ san idaisuda yak i?”

⁷ Añanem gurman Anut anen ru durupaiañ na yan ilom isou. Iñsad kagin naok naok san nuñon uyanan kuai isi a, an mi ilom isou wa. Agod iñsad ilo rumok añañ dam añañep abi wa. ⁸ Jesus Kristus ta ibiliso ibilila na wa. Tia, wagam mi, gamu en, agod pempem mi dam nek ago mi imado yau a.

⁹ Piteñanek funfun a, agod piteñanek naon sen ak san dam lo añañ ilom iñane dop adeg au banau, an amoi. Mel ta ilod dabai ipani san man Anut anen ilo panek mi a. Id añañ dugon tani san ru kubiañ funfun lo bubeñ dabai ipanad san tia ya, agod tamolpein a añañ san geg duri dupani dan, iñ dam ibinawai san man tia ya. ¹⁰ Id ilo rumok tamolpein alta amad da ya, an fo man talpein a Juda sad ubou ab lo urat digane dan, añañ diñanep diani san man Anut kob ta ipidinai na ya.

¹¹ Man dugo, nek ibol mel mudan san dar pris gurman banin lo iñaneg aupasek isuas yau o galuñ Gun Di, Gun Mok ak lo iladu yau a, ago gug iñanen tinin panu patun fo dumari igo woñ, ¹² nek ago mi Jesus dam, iñsinanen dar nam tamolpein gun idirai dilasa wo panu san dalawan patun fo madai ile ya. ¹³ Amaiak niñen o id dam panu en tibiseip kuai te tilasap misilanek iñ isini an id dam tisini wa. ¹⁴ Man dugo, tan en lo man id panu ta saen milaen mok yen dak tile man tia ya, an niñen o id panu a pempem yen amaiak abañ an tile dop tumado da.

¹⁵ Amaiak niŋen o Jesus lo, id pempem Anut per tupani wa, an idsad yai ganek Anut tupani dak igo ya. An man awad a iŋsan yaŋan niŋen o tabol ilasa dan san nuŋon rumok ak mi a. ¹⁶ Aŋ kulob uyan uyan a agane dan, agod tamolpein aenta abinawai o ilom ta iŋaon na wa. Man ata wo, yai ganek naok ago yak Anut niŋen o imat mok da.

¹⁷ Aŋanem gurman awad paen na amado dop iŋ dubol ago agane. Iŋ aŋ ŋutumi kagin dupani da, ago dop murnap Anut iŋ urat dugon digane an naon sumiaek lo idiraip nuŋon ile ilon a. Aŋ iŋ awad paen na amado tap man, iŋ yousai lo mi urat digane wa. Kabelan aŋ muruan apidinai banau, man dugo, an ta ibinawaŋ na wa.

¹⁸ Aŋ maŋ niŋema wo Bai Anut agudani wa. Man ata wo, maŋ mukubiani dak maŋanem ilo girek an Anut malan lo itaot a, agod mel fidian lo kagin uyanan ak mi migane wak ago iloma lo yen da. ¹⁹ ŋai aŋ tubun mi ago agane wo ŋususunaŋ da, an lo Anut ririan ŋai idinag pe aŋsam na ŋupalu da wa.

²⁰ Aria, maror san Anut amaiak, kontrak pempem san an san dar lo, bilelek sad titianek malan te yan, Jesus idsad Tubun en, mateŋ lo ifufunig yabisa da yan, ²¹ yu san biouŋ uyan uyan ak urat lo dabai ipanaŋ san an fidian ipanaŋ a, an lo na iŋanen ilobol agane itaot a. Ago dop mel dugon iŋsan malan lo ilo uyan ipani dan aŋ ilom lo igane ilasa wa. An man Jesus Kristus san dabai lo igane ilasa wa, iŋanen yaŋan dam id pempem tabisa wa.

²² Teig taog, tok abol pe amado dop kududom agurep ru kagin en alon uyan o ŋusumianaŋ da, man dugo, ru en katukan mi ŋigire ya.

²³ Id teid Timoti subanek lo dupasi amaiak da alon o ŋabol da. An niŋen o iŋ ipalu kisaek dop man ŋiŋanep da mupalup miliaŋ a.

²⁴ Maŋanema ilo uyan ru aŋanem gurman adi, ilo rumok adi aenta dam arupidai dop dulon a. Ago dugo tamol ensauta Itali na dupalu yan, dam iŋaned ilo uyan ru aŋsam na digane ipalu ya.

²⁵ Bai Anut anen ilo panek aŋ da pempem amado wa. Rumok.